



Broj: 03/1-50-14-7-9/11
Sarajevo, 21. 12. 2011. godine

PREDMET: Izvještaj o posjeti 6. pješadijskoj brigadi, Komandi podrške i Komandi logistike OSBiH, 2. i 3. novembar 2011. godine

veza: akt br. 03/1-50-19-1084/11

Članovi Zajedničke komisije za odbranu i sigurnost BiH (ZK) posjetili su 2. i 3. novembra 2011. godine 6. pješadijsku brigadu, Komandu podrške, Komandu logistike OSBiH i Radionicu za održavanje i uništavanje municije i minsko-eksplozivnih sredstava (TROM).

U delegaciji ZK bili su: Dušanka Majkić, predsjedavajuća, Šefik Džaferović, drugi zamjenik predsjedavajućeg, Nermina Zaimović-Uzunović, Mehmed Bradarić, Krunoslav Vrdoljak i Borislav Bojić članovi ZK, Željko Grubešić, stručni savjetnik, i Jovica Katić, stručni saradnik.

2.11.2011.

Posjeta 6. pješadijskoj brigadi OSBiH

Članove ZK, u čijoj su pratnji bili general-majori Rizvo Pleh i Anto Jeleč, u kasarni "Kozara" dočekaо je brigadni general Stamenko Novaković sa članovima uže komande.

Nakon uvodnih obraćanja Dušanke Majkić, brigadni general Novaković održao je brifing u kojem je naglasio misiju, strukturu, razmještaj i težišne aktivnosti 6. pješadijske brigade OSBiH.

Ističući težišne aktivnosti, posebno se osvrnuо na obuku, osiguranje i uređenje lokacija, sportske aktivnosti i fizičku pripremu.

Osvrćući se na probleme u radu, istakao je trenutno stanje i teškoće u osiguranju lokacija, zastoj u provođenju operacija, probleme u normativnoj regulativi i prijemu u profesionalnu vojnu službu, ocjenjivanje, nepoštivanje propisa, međuljudske odnose, kolektivno osiguranje, reformu pukova, penzioniranje, opremanje i ishranu.

Kada je u pitanju osiguranje lokacija, istakao je da nedostaju podzakonski akti iako je to borbeni zadatak koji se izvodi u miru. Zastoj u provođenju operacija karakteriziraju problem u skladištenju municije, smanjenje lokacija i nemogućnost da se do kraja završe aktivnosti te rješavanje viškova pokretne imovine.

Nedostatak bitnih normativnih akata, među kojima su Pravilo službe OSBiH, Pravilo o odijevanju, Pravilnik o naknadama za civilna lica, Sporazum o arhivi, Uputstvo i program gađanja, uputstvo o jedinstvenoj disciplinskoj politici su, po riječima generala Novakovića, nedopustivi, jer se na taj način brojne aktivnosti ne provode po procedurama.

Prijem u profesionalnu vojnu službu karakteriziraju površne i nekompletne sigurnosne provjere, propusti u kriterijima za sposobnost za službu u OSBiH te nepostojanje efikasnog sistema otpusta lica koja su sporna. Sistem ocjenjivanja nije u funkciji upravljanja karijerom. Evidentno je i protuzakonito ponašanje nadležnih lica tokom upućivanja na rad, manipulacija premještajima lica protiv kojih se vodi disciplinski postupak te još uvijek nije riješena procedura postavljanja lica na formacijska mjesta nižeg čina.

Složene međuljudske odnose karakteriziraju samovolja pojedinaca, razna podmetanja, pojava nacionalizma koja uglavnom seže do ratne zaostavštine. Profesionalna vojna lica nisu kolektivno osigurana, osim kada su na izvršenju zadataka van BiH.

Kada su u pitanju pukovi OSBiH, evidentan je zastoj u provođenju reformi. Regulatorna nije kompletna, muzeji nisu završeni, nije jasna linija komandovanja, akti se ne donose na vrijeme, a nije uređena ni oblast finansiranja. Proces penzioniranja karakterizira neusklađenost entitetskih zakona i kolektivno kršenje ljudskih prava.

Sistem opremanja u OSBiH je nekorektan jer se ne vrši po materijalnoj formaciji, nisu definirani kompleti, nedostaje standardizacija i modernizacija.

Veliki su problemi u ishrani i snabdijevanju jer se kasni sa isporukom artikala, snabdijevanje se vrši po principu "čišćenja skladišta", evidentne su privilegije prilikom izbora dobavljača, a nosioci ishrane su na niskom (bataljonskom) nivou. Kantine ne rade.

General Novaković je svoje izlaganje završio konstatacijom da se u 6. pješadijskoj brigadi realizira veliki broj planiranih ali i mnogo neplaniranih zadataka, snagama i sredstvima kojih nema u potrebnom obimu te u uslovima koji su dosta složeni.

Nakon uvodnog izlaganja generala Novakovića, članovi ZK: Šefik Džaferović, Borislav Bojić, Nermina Zaimović-Uzunović i Krunoslav Vrdoljak komentirali su dijelove izlaganja i postavili pitanja koja se odnose na probleme u radu brigade.

Prilikom planiranja posjete 6. pješadijskoj brigadi, dogovoreno je da članovi ZK obave posebne razgovore s vojnicima, podoficirima i oficirima.

Vojnici OSBiH su tokom razgovora s članovima ZK istakli sljedeće probleme:

- neujednačenost kriterija za penzioniranje između pripadnika OSBiH s prostora FBiH i Republike Srpske. Zakoni FBiH i RS po pitanju penzioniranja su različiti, što povlači

i različite mogućnosti u napredovanju u vojnoj službi i karijeri. To se posebno odnosi na pripadnike OSBiH iz srpskog naroda jer se na njih posebno odnose nepovoljna zakonska rješenja,

- nemogućnost dodatne edukacije vojničkog sastava te ograničenje koje se tiče starosne strukture vojnika od 35 godina. Smatraju da to nije realno i da to vrijeme treba pomjeriti za bar pet godina,
- velike razlike u naknadama za odvojeni život, stanarinu, razlika u koeficijentu plaća za vojnike i oficire. Cijena zakupnine stana i režija za stan su iste, a vojnici su po sadašnjim rješenjima u podređenom položaju,
- velika angažiranost na stražarskom osiguranju vojnih objekata (od 350 do 400 sati mjesečno). U to vrijeme vojnici gube dio naknada za topli obrok i prijevoz. Stražarska služba ih opterećuje jer gube vrijeme za obuku i usavršavanje, odvojeni su od porodica, a nisu zadovoljni ni ishranom u izdvojenim objektima,
- kvalitet ishrane, odjeće i čizama koje se daju na korištenje je zabrinjavajući. Nedostaje oprema kao što su kabanice, vreće za spavanje. Šatori i cerade na vozilima prokišnjavaju, a ispravnost vozila je upitna jer im je prosjek starosti 25-30 godina,
- u procesu unapređenja vojnika prisutan je nepotizam i krše se osnovna ljudska prava,
- za odlazak u mirovne misije, osim sposobnosti, potrebna je i veza i poznanstvo, što nije dobro.

Podoficiri OSBiH su u razgovoru sa članovima ZK istaknuli sljedeće:

- nedostaje transparentnosti u procesu unapređenja jer nemaju svi istu šansu za upućivanje na kurseve usavršavanja. Zbog već iznesenog problema u vezi s različitim zakonima kojima se regulira penzioniranje, podoficiri iz srpskog naroda su uskraćeni za jedan broj kurseva i školovanje jer je sužena piramida napredovanja,
- velika je odgovornost na podoficirskom kadru kada su u pitanju brojne obaveze, a posebno su nezadovoljni činjenicom da su na straži mjesečno od 350 do 400 radnih sati. Gube naknade kao i vojnici i to im je veliko opterećenje,
- nisu zadovoljni održavanjem opreme i sredstava, pri čemu su posebno istakli problem starosti motornih vozila i nerentabilnost u održavanju,
- brojni su primjeri nepotizma i protekcije prilikom slanja na obuku, posebno onu van BiH. Na usavršavanje se šalju ljudi koji nisu na svojim formacijskim mjestima.
- Ima dosta opreme koja se ne koristi jer je onesposobljena. Vozila stara više od 35 godina prevoze ljudstvo na razne i složene zadatke. Velika je razlika u koeficijentima između podoficira i oficira, a obim zadataka je često puno veći kod ove kategorije lica. Veliki je broj podoficira sa završenim fakultetom koji ne mogu napredovati.
- Problem sigurnosti lokacija na kojima se čuva municija je evidentan i ništa se ne ulaže da bude bolje.
- Novac za opremanje se ne daje po prioritetima, a odsustvo iz kasarni tokom vršenja stražarske službe remeti cjelokupan život i rad kolektiva.

- Objekti koji se renoviraju su lošeg kvaliteta i vrlo brzo se oprema koja je postavljena kvari i otpada sa zidova i plafona. Najnoviji primjer je kasarna “Žarko Zgonjanin” u Prijedoru, gdje je stanje zabrinjavajuće.
- Traže da se ponovo aktuelizira izvještaj Generalnog inspektorata iz 2007. godine u kojem je jako dobro objašnjeno stanje u OSBiH i predložene mjere za otklanjanje slabosti. Pitaju se ko to skriva i bježi od realne slike stanja u OSBiH koja je tada predstavljena.
- Nezadovoljni su koeficijentima plaća, a čuli su da doprinosi za PIO/MIO tokom 2009. i 2010. nisu uplaćeni, što ih zabrinjava.

Nakon aktivnosti u 6. pješadijskoj brigadi održan je sastanak članova ZK sa pripadnicima Komande 6. pješadijske brigade na kojem je analizirano zatečeno stanje.

Dušanka Majkić konstatirala je da je stanje lošije nego što se moglo zamisliti. Veliku odgovornost za sadašnje probleme snose MO i Zajednički štab OSBiH. Zajednička komisija ima vrlo ambiciozan plan i neće odustati u realizaciji zaključaka koji su usvojeni na 6. sjednici ZK, održanoj 18. 10. 2011. Očigledno je da su MO i ZŠOSBiH poseban svijet u odbrambenoj strukturi. Zapušteno stanje se mora riješiti, treba uvesti red i transparentnost u radu i donošenju odluka, posebno onih koje se odnose na personal.

Šefik Džaferović naglasio je da je čuo brojne korisne stvari, ali da ga najviše zabrinjavaju problemi koji karakteriziraju stanje personala i napredovanja u službi. Različiti pristupi i standardi nas odvlače od pravih i zakonskih rješenja.

Nermina Zaimović-Uzunović zaključila je da brojne navedene probleme treba da riješe MO i ZŠOSBiH. Ako hoće, oni to mogu riješiti, a posebno su zabrinjavajući problemi koji se odnose na personal. Nemogućnost napredovanja i različita zakonska rješenja u postupku penzioniranja vojnih lica mogu izazvati problem koji će poprimiti i neke druge karakteristike koje nas mogu koštati i u ovom momentu nam nisu potrebni.

Borislav Bojić reka je o da se ništa ne dešava slučajno u OSBiH. Javne nabavke su očigledno veliki problem. Ishrana, normativi, zakon o pukovima samo su dio problema koji već duže vrijeme opterećuju stanje u OSBiH. Potrebno je daleko više akcije i spremnosti da se problemi povoljno riješe.

Krunoslav Vrdoljak konstatirao je da je angažman ljudstva na straži neracionalan i da su nejednaka rješenja o penzioniranju vojnih lica nedopustiva i mogu proizvesti velike probleme.

Mehmed Bradarić pozvao je predstavnike Komande da budu do kraja uporni u rješavanju problema personala i njihove ishrane.

U završnoj raspravi učestvovao je i jedan broj pripadnika Komande 6. pješadijske brigade koji su tražili od članova ZK podršku u rješavanju problema koji su istaknuti tokom prezentacije i razgovora.

Posjeta Komandi podrške OSBiH

Članove ZK, u čijoj je pratnji bio general-major Rizvo Pleh, u Komandi podrške, u kasarni "Kozara", dočekali su general-major Gutić i brigadni general Dragan Vuković s članovima užeg dijela Komande.

Nakon uvodnih obraćanja Dušanke Majkić, general-major Gutić održao je brifing u kojem je naglasio misiju, strukturu, razmještaj, težišne aktivnosti Komande podrške OSBiH.

Ističući težišne aktivnosti, posebno se osvrnuo na nadležnosti, realizirane zadatke u 2011. probleme i prijedloge za njihovo rješavanje.

Naglašavajući probleme u radu, posebno je istakao sljedeće probleme:

- zastoj u rješavanju viška pokretne imovine,
- zastoj u rješavanju nagomilane sekundarne sirovine iz TROM-a Doboj,
- rješavanje problema na poligonu Glamoč tokom uništavanja MiMES metodom otvorene detonacije gdje su evidentni problem s lokalnim stanovništvom i lokalnim predstavnicima vlasti,
- nije počela u punom kapacitetu realizacija Sporazuma iz Doboja, potpisanog 2008. godine, a kojim su precizirane obaveze entitetskih vlada u rješavanju problema pokretne imovine. Vlada Republike Srpske počela je s dijelom aktivnosti, a predstavnici Vlade Federacije BiH nisu u dosadašnjem periodu pokazali interes za realizaciju obaveza koje su jasno definisane. Na osnovu Sporazuma iz Doboja potpuno je jasno da Ministarstvo odbrane BiH ne može ništa prodavati, što stvara dodatne probleme u rješavanju pitanja viška pokretne imovine.
- Čuvanje municije u skladištima je i dalje problem s obzirom na uslove pod kojim se izvršava taj vrlo zahtjevan zadatak.
- Činjenica je da MOBiH ima isključivu nadležnost za raspolaganje sredstvima budžeta, a potrebe na terenu su drugačije. Praksa je pokazala da se sredstva iz budžeta moraju po nekim stavkama spuštati na teren, a samim tim i na niži, ali adekvatan nivo u sistemu rukovođenja i komandovanja.
- Privremeno finansiranje usložnjava proces nabavki i stvara mehanizme koji daju opravdanje predstavnicima MOBiH za neuradeni posao.
- Upravljanje personalom, s obzirom na postojeća zakonska rješenja, veoma je složeno. To se posebno odnosi na pripadnike OSBiH iz srpskog naroda jer nisu usaglašeni zakoni PIO/MIO, što stvara niz nelogičnosti, nezadovoljstvo, a samim tim i status pripadnika OSBiH nije jednak. Neophodno je izjednačiti status pripadnika OSBiH jer sadašnje stanje izaziva nezadovoljstvo i gasi jednu logičnu piramidu napredovanja u službi.

- Osiguranje neperspektivnih vojnih lokacija, koje nisu zaposjednute, posebno je opterećenje, tako da je dnevno angažovano 405 ljudi samo na tom poslu.
- Evidentna je dotrajalost i neispravnost opreme koja se koristi u jedinicama i komandama. Servisiranje i popravak se ne rade na adekvatan način te se postavlja pitanje svrsishodnosti korištenja nekih vrlo važnih doniranih sredstava.
- Zdravstvena zaštita je riješena prema mjestu stanovanja, a ne po principu rasporeda jedinica i komandi te se postavlja pitanje zdravstvene zaštite pripadnika OSBiH.
- Nedostaju manevarska municija i artificije za izvođenje planiranih nastavnih aktivnosti i vježbi.

Kada su u pitanju realizirani zadaci Komande za podršku OSBiH, general Gutić se posebno osvrnuo na provođenje sporazuma o raspolaganju pokretnom vojnom imovinom koji se realizira sa institucijama Vlade Republike Srpske, čime je završena prva faza vraćanja ostale pokretne vojne imovine. Ukupno je predato oko 14.700 stavki, odnosno oko 30% raspoložive količine materijalnih sredstava. U prvoj fazi predavana su motorna vozila, intendantska materijalna sredstva, sanitetska sredstva, rezervni dijelovi, inženjerijske mašine i priključci, tehnička sredstva (agregati, kompresori, pretakači, razni alati).

General-major Mirsad Gutić posebno je insistirao na rješavanju viška pokretne vojne imovine. Tražio je od članova Zajedničke komisije pomoć u uspostavljanju kontakta s Vladom Federacije BiH, gdje još uvijek nije počela realizacija sporazuma o raspolaganju pokretnom vojnom imovinom. Insistirao je na pokretanju aktivnosti predaje neperspektivnih lokacija u nadležnosti Komande podrške OSBiH. Za rješavanje ovog problema potrebno je veće i konkretnije angažiranje Ministarstva odbrane BiH i entitetskih vlada.

Na kraju izlaganja general-major Mirsad Gutić naglasio je problem u rješavanju sekundarnih sirovina na lokaciji TROM Doboju, gdje Ministarstvo odbrane BiH na nadležnim institucijama treba što prije naći rješenje jer u protivnom bit će zaustavljen cjelokupan proces uništavanja municije i minsko-eksplozivnih sredstava.

Insistirao je i na hitnom rješavanju problema i nemogućnosti penzioniranja po Zakonu o službi u OSBiH lica koja su osigurana u PIO Republike Srpske.

Problemi snabdijevanja artiklima ishrane, gorivom, mazivom i kancelarijskim materijalom su više nego očigledni te je rješenje u daleko tješnjoj i adekvatnijoj saradnji na relaciji Zajednički štab OSBiH i Ministarstvo odbrane BiH.

Nakon prezentacije i izlaganja komandanta Komande za podršku OSBiH, članovi Zajedničke komisije postavili su niz pitanja iz oblasti koja je u njihovoj nadležnosti.

Članovi Zajedničke komisije obavili su razgovor s vojnicima, podoficirima i oficirima Komande za podršku OSBiH. Tom prilikom izneseni su potpuno identični problemi kao i tokom razgovora s pripadnicima 6. pješadijske brigade OSBiH.

3. 11. 2011.

Posjeta Komandi logistike OSBiH

Drugog dana posjete, 3. 11. 2011., članovi Zajedničke komisije posjetili su Komandu logistike Oružanih snaga BiH, koja se nalazi u Doboju.

U ime Zajedničke komisije za odbranu i sigurnost BiH, u ovoj posjeti su učestvovali: Dušanka Majkić, predsjedavajuća, Mehmed Bradarić, Nermina Zaimović-Uzunović, Krunoslav Vrdoljak, članovi Komisije, Željko Grubešić, stručni savjetnik, i Jovica Katić, stručni saradnik. Aktivnosti Komisije prilikom ove posjete pratio je i Boško Šiljegović, parlamentarni vojni povjerenik BiH.

Brigadir Fahrudin Agić, komandant Komande logistike, prezentirao je članovima Komisije misiju, organizacijsko-formacijsku strukturu, raspored jedinica, zatim perspektivne i neperspektivne lokacije, operacije s municijom i minsko-eksplozivnim sredstvima (MiMES), te na kraju probleme s kojima se susreću u svom radu.

Govoreći o misiji, naveo je da Komanda logistike planira, organizira i pruža logističku podršku jedinicama OSBiH na lokacijama razmještaja i upotrebe jedinica, lokalnim poligonima za obuku s ciljem osiguranja pretpostavki za izvršenje zadataka iz dodijeljene misije jedinica OSBiH. Kao glavne funkcije logistike naveo je: snabdijevanje, održavanje, saobraćaj i transport, logističke usluge, logističku infrastrukturu i zdravstvenu zaštitu. Članovima Komisije nadalje su prezentirani lanac komandovanja i organizacijsko-formacijska struktura Komande logistike, te raspored jedinica ove komande.

Govoreći o lokacijama, brigadir Agić predstavio je stanje 18 perspektivnih i 31 neperspektivne lokacije koje se nalaze u nadležnosti Komande.

Kada su u pitanju operacije sa MiMES-om, naveo je da je ukupna količina MiMES-a na perspektivnim i neperspektivnim lokacijama Komande logistike na dan 31. 10. 2011. iznosila 27.489 tona. Od tog broja, za realne potrebe po formaciji i za obuku Oružanih snaga BiH potrebno je 8.068 tona. Od ove količine na raspolaganju je 5.875 tona. Za uništenje u TROM-u i na poligonu Glamoč čeka 398,5 tona, zatim za uništenje sa neperspektivnih lokacija, za koje postoji odluka Ministarstva odbrane, predviđeno je 2713,5 tona, dok ostali višak iznosi 18.502 tone MiMES-a.

Brigadir Agić naveo je da je ukupna količina za uklanjanje 21.614 tona. Trenutni godišnji kapacitet TROM-a u Doboju iznosi 800 tona, dok se na poligonu Glamoč godišnje uništi oko 500 tona. Prema ovoj dinamici, za uništavanje u vlastitim kapacitetima Oružanim snagama BiH po sadašnjem tempu i kapacitetima treba ukupno 16 i po godina.

Ističući prijedloge i mogućnosti za brže rješavanje viškova MiMES-a, brigadir Begić je predložio:

- otvaranje drugog poligona za uništenje MiMES-a metodom otvorene detonacije,

- uključivanje civilnih firmi namjenske industrije ili drugih privrednih kapaciteta koji se mogu koristiti na uništenju MiMES;
- prodaju ili doniranje dijela viška MiMES-a
- proširenje kapaciteta RZOiU – proširenje personalne formacije,
- pomoć međunarodnih organizacija i donatora u procesu uništenja MiMES-a (kao što su u prvom redu UNDP, itd.).

Na kraju izlaganja brigadir Begić naveo je osnovne probleme s kojima se Komanda logistike susreće u svom radu, a naročito je naglasio:

- neusklađenost organizacijsko-formacijske strukture sa obimom i strukturom zadataka koje izvršava Komanda logistike (veliki broj neperspektivnih lokacija, sporost u povratu materijalnih sredstava entitetima, veliki obim zadataka pružanja pomoći civilnim strukturama izvan misije OSBiH...);
- zastarjelost MTS-a, posebno motornih vozila čija prosječna starost od preko 25 godina uzrokuje velike troškove goriva i održavanja;
- nedostatak finansijskih sredstava za redovno održavanje MTS-a, objekata i infrastrukture (npr. troškovi vode uvećani zbog većeg broja kvarova na zastarjelim instalacijama, veliki broj lokacija...);
- veliko opterećenje zbog neperspektivnih lokacija (angažiranje većeg broja lica na obezbjeđenju, troškovi komunalnih usluga - električna energija, voda, odvoz smeća npr. za devet mjeseci iznosili su 304.325,00 KM).

Dušanka Majkić, predsjedavajuća Zajedničke komisije za odbranu i sigurnost BiH, navela je da se Komisija tokom ove dvodnevne posjete jedinicama OSBiH upoznala s brojnim problemima s kojima se ove jedinice susreću u svom radu, te da će na osnovu toga u narednom periodu tačno definirati rješenja za pojedine prioritete. Kada je u pitanju problematika uništavanja MiMES-a, u narednom periodu će Komisija biti inicijator zajedničkog sastanka rukovodstva OSBiH s predstavnicima lokalne zajednice na području gdje se ovo uništavanje vrši, kako bi se našla zajednička korist od ovog procesa za obje strane. Pojasnila je da je osnovni problem u ovom procesu to što Ministarstvo odbrane BiH nije završilo s propisivanjem procedura po pitanju uništenja MiMES-a, te navela da će uništenje MiMES-a moći vršiti svaka firma koja zakonito bude prošla kroz jasno definiranu i transparentnu tendersku proceduru. Navela je da je Komisija prije ovog sastanka imala i posjetu TROM-u u Doboju, te da je na tom sastanku zaključeno da će OSBiH pokušati u narednom periodu dodatno proširiti ljudske kapacitete, s ciljem još efikasnijeg korištenja ove radionice za proces uništenja MiMES-a. Također, navela je još i problem održavanja postojeće opreme OSBiH, koja se definiše kao perspektivna vojna imovina, kao i problem neracionalnog korištenja ljudskih kapaciteta OSBiH kod osiguranja objekata.

Tokom razgovora s podoficirima i vojnicima koji se nalaze u službi u Komandi logistike, razgovarano je o statusnim pitanjima ovih lica, a naročito onih koja se tiču godina službe u OSBiH, različitim zakonskim osnovama koja se odnose na penzioniranje vojnih lica u FBiH i

RS, kao i prinadležnostima za odvojeni život, koje se ogledaju u različitim izdvajanjima za iznajmljivanje prostora za stanovanje za vojnike, podoficire i oficire. I ovdje je potenciran problem prekomjernog angažiranja profesionalnih vojnih lica na straži, sa zaključkom da lica koja idu na stražu svoju mjesečnu normu ispune praktično za sedam dana, te da nakon toga uopće ne dobiju nikakvu naknadu za prekovremeni rad. Ovo se također reflektira i na proces obuke vojnika, s obzirom da sva PVL¹ prođu tek kroz osnovnu obuku, dok većina njih uopće ne prođe kroz specijalističku obuku, u zavisnosti od toga koji VES² služe. Vojnici su naročito ukazali na nekorektne odredbe Zakona o plaćama i naknadama u institucijama BiH, ističući problem izrazitog disbalansa u plaćama kod graničnih činova dvije kategorije (podoficira i oficira), navodeći primjer da zastavnik I. klase, s 35 godina radnog staža za svoj angažman dobija 940 KM plate, dok potporučnik, koji je tek počeo svoju službu u OSBiH, ima startnu platu 1.300 KM.

Na kraju, članovi Komisije su obavili i razgovor s oficirima Komande logistike. Bilo je govora o problemima koji se tiču povećanog broja lokacija koje spadaju pod odgovornost pojedinih oficira. Navedeno je da neki od njih pod svojom komandom imaju i po 17 lokacija, dok je prema važećoj odluci Predsjedništva BiH dozvoljeno da taj broj bude maksimalno 10. Tom prilikom iznesen je i podatak da pripadnici ove komande OSBiH čak 50,57 % svog ukupnog radnog vremena troše na osiguranje vojnih objekata. Također, razgovarano je i o problemu procesa napredovanja profesionalnih vojnih lica u OSBiH, u smislu jednakih mogućnosti za prekategorizaciju i unapređenje uz poštovanje principa transparentnosti. Komentirajući primjenu zakona o javnim nabavkama, oficiri su ukazali na problem nerezonskog naručivanja rezervnih dijelova za MTS³, što proističe iz obaveze primjene člana 54. Zakona, u kojem je utvrđeno da se unaprijed, na godišnjoj osnovi, moraju praviti specifikacije opreme koja će zatrebati OSBiH tokom te kalendarske godine.

Nelogičnost se ogleda u činjenici da za mnoga sredstva, koja zahtijevaju zamjenu usljed dotrajalosti ili neispravnosti, prema Zakonu ne postoji mogućnost za popravak, dok s druge strane rezervni dijelovi za koje se pretpostavlja da će ih biti potrebno zamijeniti tokom godine ostanu potpuno neiskorišćeni. Logično rješenje koje se nameće bilo bi da se postojeći Zakon izmijeni na način kojim bi se omogućilo da se vrši trebovanje samo onih rezervnih dijelova koje u datom trenutku potrebno zamijeniti, čime bi se olakšao i učinio efikasnijim ukupan rad OSBiH, a i ostvarile značajne uštede. Do kraja sastanka oficiri OSBiH su još ukazali i na probleme u vezi s dotrajalom opremom za gašenje požara, te na probleme na koje nailaze u primjeni entitetskih zakonodavstava koja definiraju zaštitu lica na radu, naročito potencirajući problem izostanka kolektivnog ugovora za pripadnike OSBiH.

¹ Profesionalna vojna lica;

² Vojno evidencijska specijalnost;

³ Materijalno-tehnička sredstva

ZAKLJUČAK:

1. Posjeta 6. pješadijskoj brigadi OSBiH, Komandi podrške OSBiH i Komandi logistike OSBiH obavljena je 2. i 3. 11. 2011. u skladu s Orijentacionim planom rada Zajedničke komisije za odbranu i sigurnost BiH za 2011. godinu i zaključcima sa radionice održane 18. i 19. septembra 2011. u Tesliću.

2. Tokom posjete stečen je uvid u trenutno stanje, probleme i mogući način njihovog rješavanja u navedenim jedinicama i komandama. Izvještaj o uočenom stanju bit će prosljeđen Ministarstvu odbrane BiH i Zajedničkom štabu OSBiH s ciljem njihovog uključivanja u rješavanje problema s kojim se suočavaju pripadnici Oružanih snaga BiH.

3. Članovi Zajedničke komisije za odbranu i sigurnost BiH će tokom naredne planirane posjete Ministarstvu odbrane BiH razgovarati s čelnim ljudima Ministarstva o uočenom stanju i problemima tokom posjeta obavljenih 2. i 3. 11. 2011. i tražiti predlog mjera i aktivnosti za neodložno rješavanje uočenih problema, pri čemu je više nego očigledno da Ministarstvo odbrane BiH treba da preduzme korake i rješenja u oblasti gdje je neposredno nosilac obaveza i aktivnosti.

Predsjedavajuća Zajedničke komisije

Dušanka Majkić